

FEMINISMU

La Tertulia Feminista Les Comadres falla güei los sos premios “Comadre d’Oro” y “Felpeyu”

La Tertulia Feminista "Les Comadres", con una llarga experiencia nel trabayu pola igualdá ente homes y muyeres, entrega un añu sí y otru tamién el xueves enantes d'antroxu, el tradicional día de Les Comadres, los sos premios ("Comadre d'oro") y antipremios ("Felpeyu") a aquelles persones o instituciones que merecen ser destacaes pol so trabayu a favor de la igualdá ente xéneros (nel casu positivu) o a quien caltuviera posiciones contraries y negatives. L'Asociación de Clínicas Acreditaes pa la Interrupción Voluntaria del Embarazu (Acai) tuvo l'honor de ser escoyida esti añu «Comadre d'oro» 2008, que se va entregar güei de parte tarde. Pela contra, el xuez José Luis Sierra Fernández foi nomáu «Felpeyu».

Depués d'examinar munches propuestas y valorar los méritos contraíos poles diverses candidatures pal galardón, decidióse que la «Comadre d'oro» sía Acai. El motivu de la elección, según les integrantes de la tertulia feminista, ye «mantener una solución a les muyeres que nun atoparon respuesta al so problema na sanidá pública».

El titular del Xulgáu númberu 47 de Madrid José Luis Sierra Fernández marcha col «Felpeyu». El xuráu denunció «el so excessu de celu y abusu de poder pa semar el terror ente les muyeres qu'exercieron el derechu al albuertu». El galardón de «Comadre d'oro» especial recayó na Asociación de Muyeres Xuristes «Themis», presidida por Altamira González, y el «Babayu» llévalu'l maxistráu José Luis Requero. «Les Comadres» celebra la so gran cita nun llugar de Castiello güei, día 31, enantes del arrinque del Antroxu xixonés.